


www.BibleForChildren.org


San Mateo 26



Seis ari ipane
vitesse Pascua
pieta ãgua, Jesús
oso tecua Betania ve,
aheve acoi Lázaro
ombogüerayevi. Evocoiyase
María güeru medio litro
mbahe sñacua vahe
nardo, sepí iteanga vahe.
Omondo ipi rese. Ipape oiquiti
ohavapri pipe ichui. Sñacuá iteanga
evocoiyase opacatu oi pipe.



Evocoiyase Judas Iscariote, semimbohe doce vahe
pãhu pendar, oso pahi eta rerecuar upe imoñeta Jesús
mondo ãgua. Senduse,
oyemboviharete: “Yamondo
guarepochi chupe” ehi voi
eté yuvireco. Evocoiyase
Judas oseca voi Jesús
mondo ãgua
yamotarẽhimbar
upe.



Evocoiyase oyapo semimombehu
rupi tupri ité yuvireco, omoingatu
carusa Pascua pieta resendar
yuvireco aheve. Ore caru
viteseve, Jesús oipisi pan, “Aviye
ndeú” ehi Vu upe. Aipo ohe pare,
ombohi-mbohi oreu imondo, aipo
ehi: —Ndo co, pehu co che rete
—ehi.



Ipape oipisi igua riru, “Aviye ndeu”
ehi Vu upe. Aipo ohe pare ombou
oreu aipo ehi: —Peihu peyacatu
co sui. Esepia, co che ruvi, ahe
omoimera che Ru remimbotar
ipiasu vahe pẽu, ahe oyepiyerera
ava rehii angaipa rese ñero ãgua.



Aipo ehi avei yande Yar: —Simón, Simón, esendu:
Caruguar oporandu pe recoãha ãgua rese. Che rumo
ayeroqui nde rese nde yeroyasa paneẽhi ãgua.
Ereyevise cheu, emonguerẽhi catu ambuae nde rivieta
imoviracua uca ãgua yuvireco oyese —ehi Pedro upe.




—Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe. —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.



Ipape Jesús rupi orosoño
Getsemaní ve. Aheve
aipo ehi oreu: —Peguapi
cohave; che aso
ranera peve catumi,
ayeroqui —ehi. Oyeroqui
pipe aipo ehi: “Che Ru,
che rembiaisu, ndeu niha
mbahe ndayavai vahe
ité: che renose co
mbahe-mbahe tẽi sui
eve; tayapo eme che
remimbotar tẽi, nde
remimbotar rupi catu
tayapo” ehi.




Sese Judas oyepotaño ité aheve sundao rehii reseve
iyavei sundao tũparo rãrosar pahi rerecuar iyavei
fariseo eta remimondo opacatu oyoepisa
reseveyuvirecoi, guataendi reseve-seve
avei yuviraso. Ñepei rumo supindar,
pahi rerecuar ivate catu vahe
rembiguai nambi yasu
cotindar oyasia. Ahe rumo,
—Teheni, evocoi rupive
—ehi güemimbohe eta upe.
Ipare opoco inambi rese
ombogüera voi.



Evocoyase Jesús oipisi yuvireco, oviraso pahi eta
rerecuar ivate catu vahe rētave yuvireco. Pedro rumo
amombri rupive tēi osaquicue moñaño oso. Aheve
ñachimbrĩ pipe oyatapi
yuvireco, oyere tupri
tata rese oyepehe
yuvinoi. Aheve avei
Pedro ipãhuve chini.



Ip̄are mb̄ia pah̄i
rerecuar ivate catu
vahe rembiguai, inambi
asiap̄ri mu aipo ehi
chupe: —¡Av̄iye acoi
nde ité oroepia vahe
mbahe mit̄i rêta pipe
supi! —ehi chupe.
Pedro rumo, “Aní,
ndahei eté che” ehi
iriño. Aipo iheseve,
tacura oñehe. Ahese
osẽ, oyasehó iteanga
oso.





Evocoiyase opacatu ava opũha
yuvireco Jesús reraso ãgua
mborerecuar Pilato rovai. Evocoiyase
Pilato oporandu chupe: —¿Nde ité vo
judío rerecuar ivate catu vahe? —ehi.
—Nde niha aipo, “Ahe
ereico” ere cheu —ehi
imboyeví Pilato upe.




Pilato rumo omose pota Jesús viña.
Sese oporandu iri ava upe imose
ãgua. Ahe rumo osapucaí pĩrata catu
yuvireco: —¡Aní, tayaticasa!
¡Tayaticasa curusu rese!
—ehi ati-atiño yuvireco.




Ipare Pilato omondo sundao upe
yatica uca ãgua. Ichui viraso
yuvireco. Evocoiyase Jesús vinose
curusu seraso “Ava Ñcagüer” serer
vahesave (ahe serer hebreo ñehe
pipe Gólgota).



Aheve oyatica yuvireco. Seseve
avei oyatica ñuvirío ava
yuvireco, ñepei-peí yique ivii.



Ari avei ogüe tupri, turucuar guasu tũparo asiãsa avei
mbiter rupi tupri ovo. Evocoiyase Jesũs oñehe pĩrata:
—¡Che Ru, amondo che espĩritu ndeu! —ehi. Aipo ohe
pare voi omano.




Pĩtu ramose, ahe ari pipe
oyemoingatu ava yuvireco ari
mbituhusa upe nara yepi,
ahese José, tecua
Arimatea pendar,
porandusa ivate catu
vahe pendar, acoi
Tũpa

mborerecuasa
osãro vahe oico,
oquerẽhisa pipe ité
oique oso Pilato
upe oporandu ãgua
Jesús rehõgüer
rese.




Evocoiyase José virocua
turucuar secose vahe.
Curusu sui seroyi pare,
oimama voi eté ipipe.
Ipare omoingue
tuvipa ita yohopri
pipe. Ichui ita
yapayere vahe
pipe osovapi.



Ahere ayihive mbituhusa ari pipe,
yuviraso pahi eta rerecuar
iyavei fariseo Pilato upe
mbahe rese oporandu
ãgua aipo ehi
yuvireco: —Ore
rerecuar, . . .



. . . ore oroyemomahenduha
acoi iporombopa serai
vahe ñehe agüer rese:
“Acuerayevira mbosapi
ari pare omano
vahe pãhu sui” ehi
acoi cuese oicove
vitesse —ehi
yuvireco—.




Evocoiyase yuviraso tehõgüer ruvipa
rãro tupri ãgua yuvireco. Ahese
omondo tehõgüer
rovapisa ita guasu rese
mbahe imomiisa cua
ãgua yuvireco. Ipare
oseya aheve sundao
sãro ãgua yuvireco
cute.



Cõhe ramomise, domingu pipe, Maríá
Magdalena iyavei ambuae Maríá
yuviraso tehõgüer ruvipa
repia yuvireco.

Aviyeteramo tẽi orirĩi
pĩratá ivi Tũpa
rembiguai iva sui
igüeyise.



Ēgüe ehi oyepota tehōgüer ruvipave
ou, ahe virocua itape guasu
sovapisa ichui. Ipore iharive
oguapi oĩ. Osepiase
sundao, orirí eteanga
osiquiyepave yuvireco
ichui, opa oyuca
pucu-pucu tēi
yuvireco.



Tūpa rembiguai rumo aipo ehi voi
eté cuña upe: —Pesiquiyei rene.
Esepia, che aicua pe peseca
Jesús yaticapirer. Ndipoi
eté cohave. Esepia,
ahe ocuerayevi
güemimombehu rupi
eté. Tapesepia ru
supagüer —ehi.



Ipore aipo ehi: —Peso poyava voi,
tapemombehu semimbohe eta
upe: ‘Ocuera yevî omano vahe
pãhu sui iyavei ahe rane
osora pe renonera
Galilea ve. Aheve
pesepiara’ tapeye
chupe. Co che
cuaita imombehu
ãgua

pẽu —ehi Tũpa
rembiguai cuña
upe.



Evocoiyase cuña yuviraso poyava voi
suvipa sui, osiquiye pãhuve rumo
ovihaño yuvireco; ãgüe ehi
yuvinoñá iteanga imombehu
yugüeru oreu. Ahese Jesús
oyemboyecua cuña upe cute
omboavirave. Ahe cuña
evocoiyase oyemboya
sese



oñenopiha ipicuhaguã
imboeteisave yuvireco.





Coiye catumi tẽi, Jesús oyemboyecua güemimbohe
once tupri yuvirecoi vahe upe mesave yuvinoi viteseve,
oñehengata ahe oyese yeroyaẽhisa rese chupe, iyavei
ocuerayevisa mombehusar reroyaẽhi rese avei. Oñehe
pare, yande Yar Jesús oso ivave. Aheve oguapi Vu
Tũpa acato coti oĩ.



Supi eté Tūpa osaisú iteanga opacatu
ava. Sese ombou Guahĩr ñepei vahe
'tocañĩ tēi eme che Rahĩr reroyasar
yuvireco' oya, 'tovireco tecovesa
apirēhi vahe' ohesave.



Romanos 3:23 Supi eté yande opacatu yayapo angaipa,
ndayasupitii eté Tũpa reco porañetesa.

Romanos 6:23 Angaipa niha ombou manosa tẽi yandeu,
Tũpa rumo oporerecosa ombou tecovesa apirẽhi vahe
yandeu yande Yar Jesucristo rese yande recose.

Hebreos 9:27 Supi eté opa rane itera ava omano yuvireco,
ipare voi ñepeí reseve oimera porandusa.



Efesios 2:8,9 Esepia, oporovasasa pipe pe pĩsiro Jesús rese peyeroyase. Ndahei rumo pe recocuer sui tẽi peñepisiro, ahe rumo ombou porerecosa pẽu. Ndahei avei ava rembiapo sui tẽi ou vahe. Evocoiyase ndiyai chira yayemboivate ai ipipe.

Romanos 10:9,10 “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipĩsiropri peicora. Esepia, yande piha pipe yayeroya Jesús rese. Ahese Tũpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipĩsiropri yaicora.



San Juan 3:16,17 “Supi eté Tūpa osaisú iteanga opacatu
ava. Sese ombou Guahir ñepei vahe ‘tocañi tēi eme che
Rahir reroyasar yuvireco’ oya, ‘tovireco tecovesa apirēhi
vahe’ ohesave. Esepia, nomboui Tūpa Guahir co ivi pipe
ava mocañi tēi ãgua; ahe rumo ombou ava pĩsĩro ãgua.”

1 San Juan 5:11-13 Co Tūpa remimombehu: ahe ombou
yandeu tecovesa apirēhi vahe. Co tecovesa Tahir rese
secoi. Acoi oipĩsi vahe Tūpa Rahir opiha pipe, ahe vireco
avei co tecovesa. Acoi ndoipĩsĩi vahe rumo, ndovirecoi eté
tecovesa oyese. Co aicuachía pēu, pe pereco vahe Tūpa
Rahir, peicua ãgua pe supi eté pereco tecovesa apirēhi.



San Mateo 26-28; San Lucas 22-24;
San Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Guarayu Bible (gyr) © 2011, Wycliffe Bible Translators, Inc.
All rights reserved.

<https://live.bible.is/bible/GYRSBB/MAT/1>

©2026 Bible for Children, Inc.

www.M1914.org

www.bibleforchildren.org

